

21. okt. 2016

UKA2016/37

Sulisartut sunniuteqaqataaffiginngisaannik suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminniit angerlartitaagallartarnerat pillugu aalajangersakkat Nunatsinni suliffeqarfinnut tamanut tunngatitaalernissaat qulakkeerniarlugu suliffeerunnermi ikiorsiissutit pillugit inatsisartut inatsisaata nr. 2, 15. maj 2014-imeersumi § 4-ap allannguutissaanik Naalakkersuisut kingusinnerpaamik UPA2017-imi Inatsisartunut saqqummiusseqqullugit Inatsisartut aalajangiiffigisassaattut siunnersuut. Ilanngullugu siunnersuutigineqarpoq inatsisini allani attuumasuni oqaasertatigut naqqiisoqassasoq, qulakkeerniarlugu Suliffeqarfiit aaqqiissutaagallartumik sivikitsumillu sulinermik unitsitsigallarnerini sulisartut suliffeqarfimminniit angerlartitaagallartarnerat suliffeqarfinnut tamanut atuuttussanngortillugu.

(Inatsisartunut ilaasortaq Suka K. Frederiksen, Siumut)

Siullermik Siumumiit oqaatigissuarput nunatsinni suliffiit amerlanerusut pilersinnissaat ujarortuagarigatsigu qujanartumillu ukiuni kingullerni suliffiit amerlisiinneqarnerisigut suliffissaaleqisut ikiliartulermata.

Tamanna Kalaallit Nunaanni najugalinnut assigiinngitsorpassuartigut pitsaasuvoq, ikiorsiissutinik assigiinngitsunik atorfissaqartitsisut ikilimmata, akileraartut amerlatsillutik, ilaqutariit imminnut pilersortut amerlatsipput. Oqaatigineqartarportaaq sulinerooq peqqinnartuuvoq, taamaammat qularnanngilaq inuppasuit ilaqutariippasuiullu tarnikkut annertuumik peqqinnerulernerannik kinguneqartumik imminnut inuttut naleqartinnerulerneramik minnerunngitsumillu inuiaqatigiinni tapertaasutut misigineq annertunerulersoq, tamatsinnut iluaqutaavoq.

Taamaammat sulisartortukkormiut suli annertunermik Kalaallit Nunaannut tunniusseqataanissaat pilersinniarlugu pisinnaasut tamarmik sulinissaat, suliffittaarnissaat aammalu inuussutissarsiutit aalisarnermi annertunerpaamik pilersitsiffiusup allanik sukarsuarnik inuussutissarsiutissanik ilaartornissaat tamaviaarunneqartoq tamatta tapersersortariaqarparput, tamatsinnut atugarissaarnerulerneramik kinguneqassammat. Tassani aatsitassarsiorneruppat, uuliasiorneruppat, takornarialerinermiippat tamarmik avataaniit Kalaallit Nunaannut aningaasanik kaaviaartunik ilaartuisussat, Siumumiit ullut tamaasa sukataarutivut ingerlatissagivut naatsorsuutigineqassaaq. Sulisartukkormiut ullutsinnut tulluuttunik annertunermik akissaqalernissaat tamatta sukataaqataanngikkutta qanoq ililluta angussagatsigu?

Kalaallit Nunaanni aningaasarsiorneq qujanartumik siumut aallakaqqinnikuvoq, suliffissaaleqineq annikilliartuinnarpoq tamakku nuannaarutissaapput, taamaattoq aamma nalunngilarput suli ikorfartugassanik nunaqqateqaratta.

Tamaammat siunnersuuteqartup Suka K. Frederiksenip tunngavilersuutai paasilluarpavut, soorluttaaq ilisimagipput Naalakkersuisut sulianik assingusunik ingerlataqartut, taamaammat suliat pineqartut assortuussutaanatik isumaqatigiiffiupput. Kisianni siunnersuummi piffissaliusaaq suliani pineqartuni naapertuutinnigisut paasinarpoq.

Taamaamat siunnersuut ilalernartillugu, kisiannili piffissaliussa Ukiakkut 2017-imut Inatsisartut ataatsimiinnissaannut allanngotinneqassasoq Siumumiit inassutigaarput.

Taamatut oqaaseqarluta siunnersuut aappassaaneerneqannginnerani Inuusutissarsiornermut Ataatsimiititaliamut suliassanngorlugu innersuupparput Ataatsimiititaliaq kaammattorlugu siunnersuummi piffissaliussamut allannguutissamik siunnersuusioqqullugit.

Qujanaq.

Jens-Erik Kirkegaard, Siumut.